



PLANINARSKI SAVEZ FEDERACIJE BOSNE I HERCEGOVINE
MOUNTAINEERING UNION OF FEDERATION BOSNIA AND HERZEGOVINA

Mula Mustafe Bašeskije 63 - TC 'Nove Daire', 71 000 Sarajevo, Bosna i Hercegovina
tel.: +387 (0) 33 55 56 86, fax: +387 (0) 33 55 56 85, e-mail: psbih1@bih.net.ba

PRAVILNIK O PLANINARSKIM STAZAMA
PLANINARSKOG SAVEZA FEDERACIJE BOSNE I HERCEGOVINE

Broj: 86-04/16

20. FEBRUAR 2016.

www.psbih.ba



Na osnovu člana 29. Statuta Planinarskog saveza Federacije Bosne i Hercegovine, Upravni odbor na svom zasjedanju dana 20.02.2016. godine donosi:

PRAVILNIK O PLANINARSKIM STAZAMA PLANINARSKOG SAVEZA FEDERACIJE BOSNE I HERCEGOVINE

Član 1.

Predmet pravilnika

- (1) Ovim se pravilnikom uređuju uvjeti i načini gradnje, uređenja, obilježavanja, održavanja i upotreba planinarskih staza, njihova klasifikacija i kategorizacija, kao i druga pitanja od značaja za upotrebu planinarskih staza.
- (2) Prilikom gradnje, uređenja, obilježavanja i održavanja kao i njihove sigurne upotrebe primjenjuju se propisi kojima su uređene oblasti upotreba šuma, planiranja i uređenja prostora, izgradnje objekata, zaštita životne sredine, evidentiranja nekretnina i imovinsko-pravnih odnosa, ako nije ovim pravilnikom drugačije određeno.

Član 2.

Značenje pojma

- (1) Pojedini pojmovi upotrijebljeni u ovom pravilniku, imaju sljedeće značenje:

- 1) **“planinarska staza”** je uski pojas zemljišta, po pravilu na brdovitom ili planinskom prostoru, namjenjen za hodanje, trčanje, penjanje ili planinski biciklizam, koji može biti i postojeća pješačka staza na javnoj cestovnoj površini, poljska staza ili odgovarajuća šumska prometnica. Staza može biti samostalan i obično širine do jednog metra, samo u posebnim slučajevima u cilju osiguranja može biti uređen uz upotrebu prirodnih materijala, koji se može prostirati i kroz teritorij zaštićenih područja.

Planinarska staza se sastoji od sljedećih elemenata:

- početka planinarske staze,
 - trase planinarske staze,
 - cilja planinarske staze i
 - infrastrukture.
- 2) **“planinarsko društvo”, “planinarski klub” ili “udruženje planinara”** je nevladina organizacija koja je registrovano u nadležnim organima i imaju status pravne osobe, čiji se rad i aktivnosti odvijaju u skladu sa odgovarajućim zakonom, gdje su njihove srodne aktivnosti definirane u njihovom temeljnom aktu, kao: planinarstvo, alpinizam, vodičke aktivnosti, brdski biciklizam u planini i druge vrste sportsko-rekreacijskih aktivnosti u prirodnom okruženju (u daljem tekstu: planinarstvo), kao i odgajanja i obučavanja svojih članova u planinarskim vještinama, ispravnom odnosu prema prirodi, posebno u planinskim područjima, očuvanju biološke raznolikosti i zaštita prirodnog naslijeđa;
 - 3) **“povjerenik planinarske staze”** (u daljem tekstu: povjerenik) jeste planinarsko društvo, planinarski klub ili udruženje planinara koje je registrovano u skladu sa zakonom koji uređuje



udruženja i fondacije, učlanjeno u nadležni planinarski savez, osposobljeno za stručne poslove gradnje, uređenja, obilježavanja i održavanja planinarskih staza koje na osnovu područja djelovanja, nadležni planinarski savez ovlasti da gradi, uređuje, obilježava i održava planinarske staze pod uvjetima utvrđenim ovim pravilnikom. Izuzetak može biti, pod uvjetima propisanim ovim pravilnikom, da je povjerenik druga pravna ili fizička osoba;

- 4) **“nadležni planinarski savez”** jeste Planinarski savez BiH/FBiH, koji je prije donošenja ovoga Pravilnika registrovan u skladu sa zakonom koji uređuje udruženja i fondacije, a koji u skladu sa zakonom uređuje javni interes, ispunjava uvjete da djeluje kao nacionalna - državna - entitetska strukovna asocijacija u oblasti planinarstva;
- 5) **“transverzala”** (vezni put) je posebna planinarska staza povezana u cjelinu, koja ima određene kontrolne tačke na kojima su postavljene upisne knjige i pečati. Transverzala je i međunarodni pješački put koji prelazi preko teritorija Bosne i Hercegovine;
- 6) **“korisnik planinarske staze”** (u daljem tekstu: korisnik) je fizička osoba koja koristi stazu za pješaćenje, planinarenje, trčanje, planinski biciklizam i druge aktivnosti shodno utvrđenoj namjeni planinarske staze;
- 7) **“infrastruktura planinarske staze”** obuhvata: planinarsku i turističku standardnu signalizaciju planinarske staze, uređene vidikovce, odmorišta, kutije sa pečatom i upisnim knjigama, prirodna i vještačka skloništa, prelaze na vodotocima, uređene vodoobjekte (česme, bunari, izvori itd), osiguranja na stazi (sajle, merdevine i dr.);
- 8) **“održavanje planinarske staze”** je osiguravanje potrebnih uvjeta da planinarske staze budu prohodne i uređene, kao i tekuće održavanje infrastrukture na njima, sigurne za upotrebu.

Član 3.

Pravo upotrebe planinarske staze

- (1) Planinarske staze su javne.
- (2) Korisnici imaju pravo da planinarske staze upotrebljavaju isključivo za planinarenje, trčanje, planinski biciklizam i druge aktivnosti shodno utvrđenoj namjeni planinarske staze.
- (3) Povjerenici imaju pravo i dužnost da planinarske staze grade, uređuju, obilježavaju i održavaju, postavljaju standardne planinarske i turističke markacije, usmjeravajuće i informativne table, zaštitne kutije sa pečatima i upisnim knjigama kao i dodatnih osiguranja na stazi.
- (4) Vlasnik zemljišta preko kojega prelazi planinarska staza treba dopustiti korisnicima da ga koriste za planinarenje, trčanje, planinski biciklizam ili druge aktivnosti shodno utvrđenoj namjeni planinarske staze, a povjereniku da planinarsku stazu uređuje i održava.
- (5) Korisnik je obavezan planinarsku stazu upotrebljavati tako da svojim prolaskom i drugim aktivnostima ne čini nikakvu štetu na zemljištu, nekretninama, flori i fauni niti da na bilo koji način ugrožava druge korisnike.
- (6) Povjerenik mora planinarsku stazu održavati tako da se ne mijenjaju reljefne niti pejzažne karakteristike područja i ne utječe na vodno, šumsko, habitatno ili poljoprivredno stanje zemljišta, kao ni da se degradira postojeće stanje okoliša. Postavljanje markacija, usmjeravajućih tabli i drugih elemenata infrastrukture planinskih staza mora se izvesti isključivo na način određen ovim Pravilnikom i propisima koji su doneseni na njegovom osnovu.



Član 4.

Određivanje i računanje površine planinarske staze

- (1) Planinarska staza je sastavni dio zemljišne parcele preko koje prolazi, izuzev u slučajevima kada je posebno izdvojena.
- (2) Površinu dijela zemljišne parcele, odnosno zemljišnih parcela, iskazane su u m², preko kojih prelazi planinarska staza, izračunava nadležni planinarski savez tako da mjerenjem trase planinarske staze, prikazane na geodetskom planu (u daljem tekstu: prostorni prikaz planinarske staze), tu dužinu iskazanu u metrima pomnoži sa koeficijentom 1,5m.

Član 5.

Upotreba planinarskih staza

- (1) Korisnici upotrebljavaju planinarsku stazu na vlastitu odgovornost.
- (2) Korisnici pri upotrebi planinarskih staza moraju postupati samoodgovorno i odgovorno kako ne bi ni na bilo koji način ugrozili ili povrijedili sebe ili druge.
- (3) U informativnom materijalu o planinarskim stazama, planinarskim vodičima, turističkim informativnim tablama i kartama, gdje su označene planinarske staze, mora biti vidno istaknuto upozorenje na lokalnim jezicima i na najmanje tri službena jezika EU.

Član 6.

Uređenje, označavanje i opremanje planinskih staza

- (1) Uređenje planinarske staze, u smislu ovog pravilnika, obuhvata određivanje prohodnosti trase staze, njeno označavanje markacijama i usmjeravajućim tablama, učvršćivanje staze prirodnim materijalom, nasipanje staze prirodnim materijalom, postavljanje odgovarajućih osiguranja na opasnim mjestima, u cilju sigurne upotrebe staze.
- (2) Planinarske staze se označavaju standardnom planinarskom markacijom tzv. "Knafelčevom markacijom" i usmjeravajućim tablama. Standardna planinarska markacija je bijela tačka okružena crvenim oreolom, čiji je promjer 9-12 cm, sa odnosom bijele tačke i crvenoga oreola 1:2.
- (3) Planinarske staze su označeni sa markacijama koje su namijenjene za lakšu orijentaciju i informisanje korisnika o planinarskim stazama i njihovim zahtjevnostima, mogu biti opremljene sa kutijama s upisnim knjigama i pečatima, te osiguranjima na eksponiranim mjestima.
- (4) Za postavljanje markacija, usmjeravajućih tabli, zaštitnih kutija i opreme za osiguranje prethodno je potrebno dobiti suglasnost vlasnika nekretnine na kojoj se ovi elementi planiraju postaviti.
- (5) Suglasnost vlasnika nekretnine iz prethodnog stavka nije potrebno ukoliko se markacije, usmjeravajuće table, zaštitne kutije i oprema za osiguranje zbog dotrajalosti zamjenjuje novim.
- (6) Upravni Odbor PS BiH/FBiH će na prijedlog Komisije za planinarske puteve donijeti poseban pravilnik kojim se određuju dimenzije, oblik i boja standardnih planinarskih i turističkih markacija i usmjeravajućih tabli, kao i način i uvjete postavljanja usmjeravajućih tabli, zaštitnih kutija i opreme za osiguranje na planinarskim stazama i njihovo obilježavanje i uređivanje.



- (7) Za aktivnosti na uređenju planinarskih staza koji dijelom ili u potpunosti prolaze teritorijem zaštićenih zona neophodna je saglasnost nadležnog organa.

Član 7. Zabrane

- (1) Zabranjeno je ograničavati pristup planinarskim stazama, uklanjati, uništavati ili na drugi način nanositi štetu markacijama, usmjeravajućim tablama, zaštitnim kutijama, opremi za osiguranje, kao i drugim elementima infrastrukture planinarske staze.
- (2) Ako je markacija, usmjeravajuće table, zaštitna kutija ili drugi element infrastrukture planinarske staze postavljen na zid građevine ili neke druge konstrukcije, pa se takva građevina ili konstrukcija namjerava ukloniti ili izvršiti neki drugi zahvat u skladu sa pripisima o građenju, investitor i izvođač takvih radnji mora prije poduzimanja bilo kakvih radova osigurati odgovarajuću zamjensku markaciju, tablu i drugi element infrastrukture planinarske staze.
- (3) Odredbe prethodnog stavka o obaveznom osiguranju zamjenske markacije, table i drugih elemenata infrastrukture planinarske staze koji su u skladu sa ovim pravilnikom postavljeni na stablo, a koje se planira posjeći u skladu sa propisima koji uređuju šumarstvo.

Član 8. Klasifikacija planinarskih staza

- (1) Prema namjeni planinarske staze su podijeljeni u sljedeće klasifikacione skupine:
- a) Planinarske staze
 - b) turističke staze
 - c) staze za planinski biciklizam
 - d) staze posebne namjene.
- (a) “Planinarska staza”** je uređena staza u planini, za čiju je upotrebu potrebna fizička spremnost i obučenost korisnika, ali ne i upotreba posebne pomoćne opreme koja se koristi za alpinizam.
- (b) “Turistička staza”** je uređena staza čija upotreba, po karakteristikama terena, ne zahtjeva posebnu fizičku spremnost i obučenost korisnika.
- (c) “Staza za planinski biciklizam”** je staza u planini namijenjena vožnji bicikla kroz brdsko-planinske predjele.
- (d) “Staze posebne namjene”** su rekreativne, ekološke, poučne, speleološke, istraživačke ili sportsko takmičarske.

Član 9. Kategorizacija planinarskih staza

- (1) Prema tehničkoj zahtjevnosti – težini planinarske staze su svrstane u tri kategorije:
- lake,
 - teške,
 - vrlo teške,
- osim staza za posebne namjene koje su po zahtjevnosti uvijek lake.



- (2) U informativnim materijalima o planinarskim stazama, vodičima, turističkim informacionim tablama i kartama gdje su označene planinarske staze mora biti označena i njihova kategorija.
- (3) Kategorizaciju planinarskih staza prema težini vrši PS BiH/FBiH.
- (4) Izuzetno od prethodnog stava, kategorizaciju planinarskih staza koje se pretežno ili isključivo koriste za planinski biciklizam može vršiti i asocijacija registrirana u skladu sa zakonom koji uređuje udruženja i fondacija, i ako su u skladu sa zakonom koji uređuje javni interes u sportu ispunjava uvjete da djeluje kao nacionalna-državna-entitetska strukovna asocijacija u oblasti planinskog biciklizma;
- (5) Uvjete, način i postupak kategorizacije planinarskih staza prema težini se utvrđuje pravilnikom uz prethodno mišljenje nadležnog planinarskog saveza i nadležne strukovne asocijacije u oblasti planinskog biciklizma.

Član 10.

Prostorni prikaz planinarskih staza i njihova kategorizacija

- (1) Prostorni prikaz planinarskih staza nadležna Komisija prosljeđuje na odobrenje Upravnom odboru PS BiH/FBiH. Planinarski savez izdaje potvrdu o usklađenosti prostornog prikaza planinarskih staza u skladu sa propisima.
- (2) Kategorizaciju planinarskih staza nadležna Komisija prosljeđuje na odobrenje Upravnom odboru PS BiH/FBiH. Planinarski savez izdaje potvrdu o usklađenosti kategorizacije planinarskih staza u skladu sa propisima.
- (3) Planinarska staza koja definira prostorni prikaz planinarske staze dobijaju status planinarskih staza po ovom pravilniku, po izdavanju potvrde iz stava (1) ovoga članka.
- (4) Odobreni prostorni prikaz planinarskih staza i njihova kategorizacija mogu se izmijeniti po postupku koji je identičan za njihovo potvrđivanje.
- (5) Uz odobrene predložene izmjene i dopune može se status određene planinarske staze ukinuti ili promijeniti s obzirom na njegov prostorni prikaz ili kategorizaciju.

Član 11.

Registar planinarskih staza

- (1) O prostornom prikazu planinarskih staza, njihovoj kategorizaciji, kao i planinarskim društvima ili fizičkim i pravnim osobama koje u skladu sa ovim pravilnikom djeluju kao povjerenici planinarskih staza, uspostavlja se i vodi registar planinarskih staza (u daljem tekstu: registar).
- (2) Registar na temelju podataka o prostornom prikazu planinarskih staza, njihovoj kategorizaciji, kao i planinarskim društvima ili fizičkim i pravnim osobama koje u skladu sa ovim pravilnikom djeluju kao povjeritelji planinarskih staza, koje dostavlja nadležni planinarski savez u skladu sa odredbama propisa koji uređuju prostorni informacijski sistem, uspostavlja, vodi i održava nadležna komisija PS BiH/FBiH.
- (3) Podatke iz prethodnog stavka unosi nadležna komisija PS BiH/FBiH u registar planinarskih staza PS BiH/FBiH.



Član 12.

Izbor povjerenika planinarskih staza

- (1) Izbor povjerenika planinarskih staza se vrši tako da nadležna Komisija saveza na temelju spiska planinarskih društava koja su učlanjena u njega, za koje se smatra da ima najmanje 30 članova, od kojih da najmanje 2 člana zadovoljavaju propisane uvjete za zvanje markacista, napravi spisak planinarskih društava i zajedno sa spiskom planinarskih staza, na kojima bi svako društvo obavljalo dužnost povjerenika, dostavi Upravnom odboru PS BiH/FBiH na odobrenje.
- (2) Smatra se da fizička osoba ispunjava uvjete predviđene za markacista ako je s uspjehom položila ispit iz osposobljenosti u oblasti održavanja i označavanja planinskih staza, za postavljanje markacija, usmjeravajućih tabli, zaštitnih kutija i osiguranja, prema programu i na način koji je na prijedlog nadležna komisija predložila i odobrio PS BiH/FBiH.
- (3) PS BiH/FBiH će izdati potvrdu odabranim planinarskim društvima u skladu sa uvjetima iz stava (1) ovog člana.
- (4) Nakon izdavanja potvrde iz prethodnog stava ovog člana odabrana planinarska društva dobijaju status povjerenika i sa PS BiH/FBiH potpisuju povjeriteljske sporazume, u pravilu na neodređeno vrijeme.
- (5) U povjeriteljskim sporazumima detaljnije se određuju međusobne obaveze, naročito prava i obaveze povjeritelja u vezi sa vršenjem povjeriteljstva, slučajevi i uzroci jednostranih prekida sporazuma zbog kršenja odredaba ovoga pravilnika i propisa donesenih na temelju njega, kao i drugih propisa koji uređuju oblast čuvanja prirode, poljoprivrede i upotrebe šuma, te način regulisanja međusobnih odnosa u slučaju prestanka važnosti sporazuma.
- (6) Povjeriteljski sporazum prestaje ako se planinarske staze, koje su predmet sporazuma, ukinu u skladu sa odredbama ovoga pravilnika ili se utvrdi da određeno planinarsko društvo više od 6 mjeseci ne izvršava povjeriteljske obaveze ili više ne ispunjava uvjete za povjerenika iz stava (1) ovog člana, odnosno sa jednostranim raskidom sporazuma. Razlozi i uvjeti za raskid sporazuma, kao i međusobna prava i obaveze po raskidu sporazuma određuju se u povjeriteljskom sporazumu.
- (7) Ako na temelju spiska planinarskih društava nije moguće predlagati povjeritelja određene planinarske staze, ili ukoliko izabrano planinarsko društvo odbije uvjete povjeriteljskog sporazuma ili određeno planinarsko društvo koje je potpisalo povjeriteljski sporazum odrekne se prava djelovati kao povjeritelj, ili se povjeriteljski sporazum raskine jednostrano, PS BiH/FBiH može sklopiti povjeriteljski sporazum sa bilo kojom pravnom ili fizičkom osobom, po pravilu na određeno vrijeme, najviše 5 (pet) godina, uz uvjet da prije sklapanja ovakvoga ugovora fizička osoba dobije potvrdu da ima ugovoreno učešće još najmanje dvije fizičke osobe koje ispunjavaju uvjete predviđene za markacistu.
- (8) Nakon izdavanja potvrde iz prethodnog stavka pravna ili fizička osoba dobija status povjeritelja po ovom pravilniku i sa PS BiH/FBiH sklapa povjeriteljski sporazume na određeno vrijeme.
- (9) Nakon isteka roka od 5 (pet) godina PS BiH/FBiH mora osigurati povjeritelja za tu planinarsku stazu na prethodno opisani način. Ukoliko to nije moguće, rok važenja privremenog povjeriteljskog sporazuma produžava se za narednih 5 (pet) godina. Prije produženja sporazuma potrebno je pribaviti potvrdu iz stava (7) ovog člana.



Član 13.

Održavanje planinarskih staza

- (1) Povjerenik mora održavati planinarsku stazu u ugovorenom periodu, na način da se ne mijenjaju reljefne karakteristike područja, degradiraju vodene, šumske, stanišne i poljoprivredne osobine zemljišta i ugrožava postojeće stanje okoliša, u skladu sa ovim pravilnikom.
- (2) Povjerenik je obavezan surađivati sa upraviteljem područja po kojem prolazi planinarska staza.

Član 14.

Gradnja novih planinarskih staza

- (1) Uspostavljanje i gradnja novih planinarskih staza mora se planirati i izvoditi uz poštovanje propisa o zaštiti prirode, uređenja šuma, divljači i lovstva, tako da se potpuno prilagodi prirodnom okolišu i poštuju tehnički i ekološki uvjeti tla, vode, biljaka i životinja kako bi se utjecaj sveo na što manju mjeru.
- (2) Uspostavljanje i gradnja novih planinarskih staza se mora izvoditi tako da ne:
 - mijenja vodene, šumske, pejzažne i reljefne karakteristike područja,
 - uzrokuje erozijske procese,
 - utječe na područja važna za zaštitu divljih životinja i samoniklog bilja,
 - utječe na prirodne vrijednosti i područja zaštićena propisima o zaštićenim područjima.
- (3) Za uspostavljanje i gradnju novih planinarskih staza koriste se prostornoplanski akti s kojima se uređuje područje na kojem bi se takve planinarske staze gradili, pod uvjetom da se s vlasnikom zemljišta preko kojega prelazi planinarska staza, kao i nadležnim organima i institucijama ovlaštenim za zaštitu okoliša, očuvanje prirode, uređenje šuma i čuvanje kulturnog naslijeđa, uskladi trasa staze, kako je to određeno u propisima koji uređuju šumske prometnice.
- (4) Smatra se da vlasnici zemljišta, sa kojima je usklađena trasa planinarske staze, suglasni da se sklopi pismeni sporazum o uspostavi i korištenju za potrebe hodanja, trčanja, penjanja, planinskog biciklizma i druge aktivnosti shodno utvrđenoj namjeni planinarske staze, od strane korisnika, i u korist povjerenika za potrebe njenog održavanja, pripremljeno za upis u registar.
- (5) Smatra se da sa organima nadležnim za čuvanje okoliša, zaštitu prirode, uređenje šuma i zaštitu kulturnog naslijeđa usklađena trasa planinarske staze znači da su ti organi u skladu sa propisima koji uređuju čuvanje okoliša, zaštitu prirode, uređenje šuma i zaštitu kulturnog naslijeđa, izdali akt o suglasnosti sa planiranom trasom planinarske staze.
- (6) Prije početka upotrebe nove planinarske staze PS BiH/FBiH mora izraditi odgovarajuće izmjene i dopune prostornog prikaza planinarskih staza i njihove kategorizacije, odrediti povjerenika i pobrinuti se za upis u registar planinarskih staza.
- (7) Prije početka izgradnje i markiranja planinarske staze pribaviti saglasnost Komisije za planinarske puteve PS BiH/FBiH.



Član 15.

Monitoring uredenosti i održavanja planinarskih staza

- (1) Monitoring uredenosti i održavanja planinarskih staza vrši Komisija za planinarske puteve PS BiH/FBiH.
- (2) Na osnovu utvrđenih nepravilnosti u sprovođenju povjeriteljskog sporazuma, ovog pravilnika i drugih propisa, a na temelju pismenog akta Komisije za planinarske puteve, Upravni odbor PS BiH/FBiH obavezan je pokrenuti postupak raskida sporazuma o održavanju planinarskih staza sa izabranim povjerenikom i izvrši izbor novog povjerenika.

Član 16.

Postavljanje prepreka/ograda

- (1) Na planinarskim stazama nije dozvoljeno postavljati prepreke ili ograde. Izuzetak je postavljanje ograde ili drugih prepreka koje su potrebne radi ispaše domaćih životinja.
- (2) Ograda postavljena duž planinarske staze mora biti vidljivo obilježena, a ako je postavljena električna ograda, odnosno električni pastir, oznaka mora sadržati i upozorenje o opasnosti zbog mogućeg električnog udara.
- (3) Obilježavanje ograde dužan je da izvrši vlasnik zemljišta koji je ogradu postavio.

Član 17.

Privremeno i trajno zatvaranje planinarskih staza

- (1) Povjerenik je dužan privremeno, djelimično ili u cjelosti zatvoriti planinarsku stazu ako je zbog promjena u prirodi postala opasna za korisnike ili je oštećenje osiguranja takvo da se planinarska staza ne može koristiti ili je potrebno izvršiti veće radove na njenom održavanju.
- (2) U slučajevima zatvaranja planinarske staze iz stavka (1) ovog člana, zabrana će trajati do otklanjanja razloga za njeno zatvaranje.
- (3) Povjerenik je dužan da preko PS BiH/FBiH, a u izuzetnim slučajevima neposredno, o privremenom zatvaranju staze obavijesti nadležni organ lokalne uprave i korisnike, postavljanjem znaka zabrane upotrebe planinarske staze.
- (4) Ukoliko nije moguće otkloniti opasnosti na planinarskoj stazi koja je privremeno zatvorena, povjerenik će preko PS BiH/FBiH obavijestiti nadležni organ lokalne uprave o potrebi trajnog zatvaranja planinarske staze.
- (5) Ukoliko zbog prekomjerne ili nepravilne upotrebe planinarske staze dođe do ugrožavanja flore i faune na zemljištu preko kojeg prolazi planinarska staza, povjerenik može tu stazu privremeno zatvoriti do pribavljanja mišljenja organa državne uprave nadležnog za poslove zaštite životne sredine o utjecaju staze na floru i faunu, na temelju kojeg će izvršiti sanaciju štete ili predložiti njeno trajno zatvaranje.
- (6) O trajnom zatvaranju planinarske staze iz stava. (4) i (5) ovog člana odlučuje Upravni odbor PS BiH/FBiH, odnosno organ lokalne uprave i predlaže njegovo brisanje iz registra planinarskih staza, odnosno biciklističkih staza.
- (7) PS BiH/FBiH, odnosno nadležni organ lokalne uprave dužan je da preko sredstava javnog informiranja, blagovremeno, obavijesti javnost o postavljanju privremene zabrane, odnosno trajnom zatvaranju planinarske staze.



Član 18.

Izveštavanje

- (1) Povjerenik je dužan najmanje jednom u šest mjeseci izvještavati PS BiH/FBiH o stanju planinarskih staza i infrastrukture za koju je odgovoran, o procjeni ukupnog broja korisnika, odnosno posjetilaca u tekućoj godini i drugim podacima od značaja za održavanje i označavanje planinarskih staza koje uređuje i održava.
- (2) PS BiH/FBiH dužan je jednom godišnje izvještavati svoje članstvo, druge interesantne agencije, organe uprave i druge o stanju i održavanju planinarskih staza i drugim podacima koje vodi u registru planinarskih staza.

Član 19.

Ograničenje upotrebe planinarskih staza

- (1) Po planinarskim stazama koji ne prolaze po poljskim i šumskim prometnicama, a namijenjeni su isključivo kretanju pješaka, nije dozvoljena vožnja s brdskim biciklima, motociklima, biciklima s pomoćnim motorom i drugim vozilima, izuzev ukoliko je to vozilo namijenjeno opskrbi planinarskog doma ili spašavanja unesrećenog, kao i u slučajevima kada vlasnik zemljišta preko kojega prelazi planinarska staza koristi vozilo za vlastite potrebe.
- (2) Planinarsku stazu zabranjeno je koristiti i za jahanje kao i za vođenje životinja, osim ukoliko je upotreba tih životinja namijenjena opskrbi planinarskog doma, kao i u slučajevima kada vlasnik zemljišta preko kojega prelazi planinarska staza koristi te životinje za vlastite potrebe.
- (3) Po planinarskim stazama se može izvoditi utrka kao sportsko natjecanje isključivo uz suradnju sa povjerenikom planinarske staze.
- (4) Ako je sadržaj sportskog natjecanja takav da obuhvata i vožnju brdskih bicikala, kao što je DH, triatlon i sl., on se može održavati samo ako su ispunjeni uvjeti iz prethodnog stava, te da se dio staze po kojem se voze bicikli zatvori za vrijeme utrke.

Član 20.

Financiranje uređenja, označavanja i održavanja i vođenja registra planinarskih staza

- (1) Za uređenje, održavanje i označavanje planinarskih staza povjerenik ima pravo na naknadu troškova u skladu sa povjeriteljskim sporazumom.
- (2) Naknadu iz prethodnog stavka osigurava povjerenik, Komisija za planinarske puteve i PS BiH/FBiH iz sljedećih izvora:
 - proračunskih i drugih javnih sredstava koja dobija po osnovu svoga djelovanja,
 - prihoda za usluge koje obavlja,
 - donacija,
 - drugih sredstava pribavljenih u skladu sa zakonom.
- (3) Financijska sredstva za uređenje, održavanje i označavanje planinarskih staza mogu se osigurati iz državnoga proračuna na temelju financijskog i godišnjeg programa rada nadležnog planinarskog saveza ili povjeritelja u skladu sa propisima koji uređuju sufinansiranje udruženja.
- (4) PS BiH/FBiH raspoređuje financijska sredstva namijenjena naknadama iz stava (1) ovog člana pojedinim povjerenicima srazmjerno potvrđenom financijski iskazanom godišnjem programu rada iz stava (3) ovog člana, pri čemu se uzima u obzir dužina i kategorija planinarske staze, kao i obim potrebnog održavanja.



- (5) Način plaćanja naknade troškova povjerenjima iz stava (1) ovog člana detaljno se uređuje u povjerenjima sporazumu.

Član 21.

Nadzor

- (1) Nadzor nad sprovođenjem ovog pravilnika i pod akata donesenih na temelju njega, vrši Komisija za planinarske puteve i Upravni odbor PS BiH/FBiH, svako u skladu sa svojim ovlastima.

Član 22.

Kaznene odredbe

Kaznene odredbe će se definirati donošenjem Zakonske regulative o planinarskim stazama.

Član 23.

Rok za donošenje podzakonskih propisa

- (1) Upravni odbor PS BiH/FBiH će donijeti pod akte i propise na temelju ovoga pravilnika u roku od šest mjeseci od usvajanja ovoga pravilnika.

Član 24.

Rok za uspostavu registra planinarskih staza

- (1) Komisija za planinarske puteve će podatke potrebne za uspostavljanje registra planinarskih staza dostaviti Upravnom odboru PS BiH/FBiH najkasnije u roku od jedne godine nakon donošenja pod akata propisa iz stava (4) člana 12. i člana 25. ovog pravilnika.

Član 25.

Rok za usklađivanje markacija, usmjeravajućih tabli i drugih informacijskih tabli

- (1) Oblik i boja postojećih markacija i postojećih usmjeravajućih tabli i drugih oznaka koji su namijenjeni informisanju korisnika o planinarskim stazama, njihovoj težini kao i olakšanju orijentacije, uključujući i postojeće zaštitne kutije s upisnim knjigama i pečatima, moraju se uskladiti sa odredbama ovog pravilnika najkasnije u roku od dvije godine nakon donošenja pod akata i propisa iz stava (6) člana 6. ovog pravilnika.
- (2) Postojeće turističke informacione table, gdje su označene planinarske staze, moraju se dopuniti sa istaknutim upozorenjima iz stava (3) člana 5. ovog pravilnika najkasnije u roku od dvije godine nakon usvajanja ovog pravilnika.
- (3) Postojeće turističke informacijske table, gdje su označene planinarske staze, moraju se dopuniti sa kategorijom planinarske staze iz stava (2) člana 9. ovoga pravilnika najkasnije u roku od dvije godine od donošenja pod akata i propisa iz stava (5) člana 9. ovog pravilnika.



Član 26.

Rok za usklađivanje povjerenika i povjeriteljskih ugovora

- (1) Sa danom usvajanja ovog pravilnika smatra se da su povjerenici planinarskih staza ona planinarska društva, kao i pravne i fizičke osobe, koji su provodili aktivnosti na održavanju planinarskih staza na dan usvajanja ovog pravilnika.
- (2) Nadležni planinarski savez i povjerenici moraju sklopiti, odnosno uskladiti postojeće povjeriteljske sporazume u skladu sa članom 12. ovog pravilnika najkasnije u roku od jedne godine od usvajanja ovog pravilnika.

Član 27.

Dosadašnji markacisti

- (1) U odnosu na odredbe stava (2) člana 12. ovog pravilnika, smatra se da fizička osoba ispunjava uvjete za markacistu koja je prije donošenja pod akata i propisa iz stava (2) članak 12. ovog pravilnika sa uspjehom položila ispit iz osposobljenosti u oblasti održavanja i označavanja planinarskih staza, za postavljanjem markacija, usmjeravajućih tabli, zaštitnih kutija i osiguranja, prema važećem programu prije donošenja programa za osposobljavanje, a uz prethodno priloženi akt sa kojim se dokazuje da je stekao zvanje maraciste, kao i da je već radio na obilježavanju i uređenju planinskih staza.
- (2) Komisija za Markacije će voditi Registar markacista i odobravati aktivnost.

Član 28.

Važenje pravilnika

Ovaj Pravilnik stupa na snagu danom donošenja i objavljivanja.

Predsjednik PSFBiH
Zehrudin Isaković